

晉師三楚奏稿

卷之拾壹

咸豐柒年分





欽差大臣湖廣總督奏稿卷之十一

咸豐七年分

會同北撫奏襄陽首逆就擒餘匪殲除殆盡  
楚境及附近陝豫各屬漸就肅清並請獎  
出力馬隊官兵一摺

附奏懇將隨同剿辦襄鄖匪徒出力之同知  
張由庚等獎勵一片

附奏懇開復北藩司馬秀儒等革職處分並



給還叅將阿昌阿頂戴一片

附奏飭令頭等待衛克興阿回京供職一片

奏黑龍江協領等缺揀選軍營出力人員請

補一摺

附奏甯古塔協領員缺請以鑲白旗佐領祿

昌等遞行陞補一片

附奏懇展緩例貢方物一片

會同北撫奏官軍踏平小池口沿山賊壘一

摺

奏委員設局趕辦北岍軍需銷算一摺

附奏北岍兵勇鹽糧每名月給銀三兩六錢

一片

附奏請揀發副叅等員來楚一片

奏報荆宜二局咸豐六年九十等月抽提鹽

課數目一摺

會同北撫奏覆九江一軍無可抽撥並懇留



王國才暫緩赴滇一片

會同北撫奏遵保剿辦襄鄖賊匪尤為出力  
人員一摺

附奏懇將力籌防堵保全城池之藩司知府  
獎勵一片

附奏襄陽紳民齊團剿賊懇加廣學額以示  
鼓勵一片

附奏懇留降補守備常勝在楚差委一片

會同北撫奏皖賊上犯楚界移調各營迎剿  
大獲勝仗一摺

附奏楚北軍務喫緊難以撥兵赴豫一片

附奏請飭四川山陝各省籌撥餉銀一片

附奏將發剩部頒捐照轉發北藩司設局辦  
理一片

附奏請飭調陝西副將龍澤厚一軍赴河南  
軍營一片



附奏進駐省署辦理善後等事一片

奏揀員請補苗疆守備要缺一摺

附奏懇將隨營差遣之候選同知各員飭部

先行銓選一片

附奏請飭部遇有北南兩省副將叅遊都守

缺出暫停陞選概由軍營揀員請補一片

奏叅安襄等屬堵禦不力之存城各營弁請

分別斥革一摺

附奏懇將剿辦襄匪出力之道員優獎一片

附奏懇留丁憂道員差遣一片

會同北撫奏議覆懲辦逃兵一摺

奏紳民捐資助餉請叙官職一摺

附奏總兵各員捐廉助餉請將其子議叙一

片

奏揀員擬補布特哈防禦等缺一摺

附奏懇展限舉行軍政一片



附奏請將打仗陣亡之馬隊官兵議卹一片

會同北撫奏襄陽首逆就擒餘匪殲除殆盡  
楚境及附近豫陝各屬漸就肅清並請獎  
出力馬隊官兵一摺

奏為襄陽首逆就擒餘匪殲除殆盡現在楚境及  
附近豫陝各屬地方漸就肅清恭摺馳陳仰乞  
聖鑒事竊二月望後副都統銜巴揚阿等率馬步各  
軍於南漳縣屬武安堰設計圍勦即據股匪劉  
尚義等率眾四千餘人棄械投誠巴揚阿分別



斬釋仍酌留首從各犯隨營打仗維時另股首  
逆高二先等裹脅六七千人忽分忽合先於十  
八日分竄河南之內鄉縣屬經叅領舒保督帶  
馬隊會合南陽鎮總兵邱聯恩步軍前後夾擊  
斃匪千餘而敗匪復竄回棗陽縣屬之隆興寺  
黑龍集璩家灣等處其竄聚襄陽穀城等縣四  
鄉者或數百人或千餘人東擊西走漸滅漸起  
二十七日舒保與營總訥依琫阿知府唐訓方

同知唐協和等大戰於璩家灣斬首數百級  
接報後體察賊勢聚踞襄棗正可圍而殲旃當  
即咨行巴揚阿邱聯恩及襄陽道羅遵殿陝西  
副將龍澤厚四川松潘鎮總兵德恩等遏其西  
竄絕其北嚮仍於上游襄鄖入山歧路節節布  
置下游荆宜要隘面面防勦而高二先為匪衆  
巨魁不擒此賊則流毒正無底止也三月初三  
四日我軍馬步各隊於襄棗穀城縣境分道圍



逼該逆又盡踞棗屬之宋家營白家集等鄉放  
火剽掠巴揚阿商令唐訓方等乘連日大雪之  
後出其不意四面圍勦遂於初三五三更以唐協  
和督帶訓勇扼勦西路舒保訥依琫阿各率馬  
隊繞圍北面訓導鄒漢章縣丞孫振銓帶寶勇  
義勇由東面進勦唐訓方督隊由南繞北而進  
初六日午刻各軍齊抵逆巢號砲一周馬步齊  
進該逆亦分隊出迎舒保訥依琫阿躍馬舞刀

揮隊直入殪其大頭目楊五先高良壁及匪衆  
數百我軍步隊復四面奮勦喊震山谷逆衆披  
靡死者狼籍活捉百餘人訊供正法正以日暮  
收隊而密探首逆高二先僅剩數百騎向西路  
遁走唐協和與舒保分撥馬步各隊連夜分五  
路躡追已革遊擊郭榮茂成福及已革知府海  
順知縣伊勒哈圖各帶兵練紳團分道抄擊初  
七日黎明首逆高二先等奔至郭家岡山下正



遇我軍伏兵齊起四面合圍生擒該首逆高二  
先大頭目張文質劉添喜朱傳焦安貴張所寬  
等六名又陣殲匪黨數百餘匪逃散無幾當將  
該逆首解回郡城由羅遵殿等訊明綁赴市曹  
凌遲梟示襄鄖漸就肅清等情馳報前來查逆  
首高二先等聚眾叛亂始則踞擾樊城旋復奔  
竄房竹深山恃險負嵎若驅虎出山彼逸我勞  
終無了局一經流入陝豫則西北各省更形滋

蔓深為可慮 官 前於武安堰賊匪投誠之  
役曾嚴飭巴揚阿將劉尚義等投誠一股責成  
親自妥為布置分別安插遣散剪其枝葉以孤  
賊勢今大股逆首高二先等復經我軍圍逼竄  
聚襄棗一帶仰賴

聖主威福將首要各逆生擒就戮寔足以申  
天討而快人心現在襄鄖及附近陝豫地方雖漸肅  
清惟襄樊一帶平素五方雜處匪棍出沒靡常

現當年荒穀貴貧民無業又兼遣釋投誠脅匪  
在在安插匪易仍當擇留唐訓方舒保馬步各  
軍以資鎮壓兼飭搜捕零星敗匪不准漏網其  
餘兵勇分別遣撤以節糜費除在事出力文武  
員弁兵勇團練人等另行仰懇

恩施外茲將馬隊擒斬首逆各官兵先行覈寔酌擬  
隨摺開單恭呈

御覽籲求

天恩優獎以昭激勸所有襄陽首逆就擒餘匪殲除  
殆盡楚境及附近陝豫地方肅清緣由謹會同  
江甯將軍都興阿署提臣前任鄖陽鎮總兵官  
訥欽繕摺由驛六百里馳

奏伏乞

皇上聖鑒訓示謹

奏咸豐七年三月十九日拜發四月初四日奉到  
硃批另有旨欽此同日奉到咸豐七年三月二十六



日內閣奉

上諭官 胡林翼奏襄陽首逆就擒餘匪肅清請將  
勦辦尤為出力之馬隊官兵先行獎勵開單呈覽  
一摺湖北襄陽匪徒滋事前經胡林翼馳奏生擒  
首逆地方肅清所有出力員弁已降旨准其擇尤  
保奏茲據官 等奏此次擒斬首逆馬隊官兵尤  
為得力自應先沛恩施以示獎勵護軍叅領舒保  
著記名以副都統簡放副總管訥依琿阿著以總

管儘先補用先換頂戴委叅領富珠哩委防禦金  
祥馬甲貴福博陞額領催薩穆均著賞換花翎馬  
甲德普西訥著賞戴花翎委叅領諾明阿委驍騎  
校明陞榮太均著以驍騎校儘先補用馬甲托克  
托布著賞給五品頂戴花翎馬甲扎明阿著以應  
升之缺升用安冲阿瓦爾哈山金清阿烏勒西遜  
均著以驍騎校儘先升用安冲阿並著賞戴五品  
花翎保升驍騎校桂連著以防禦升用馬甲魁春

德慶吉隆阿均著以驍騎校升用三等侍衛忠齡著以二等侍衛儘先補用五品花翎農依布馬甲巴克唐阿巴里沁壽常五品藍翎岳隆阿均著以驍騎校儘先升用岳隆阿並著賞換四品頂戴花翎保升委叅領桂昌著以副護軍叅領升用領催德隆阿馬甲哈爾圖巴德琿阿巴音布尼壽七品軍功西凌阿均著賞戴花翎委叅領雙福著以防禦補用馬甲保升來喜全勝德隆阿達豐阿均著

以驍騎校儘先升用書識楊鳳翥著以從九品不論雙單月歸部遇缺即選並賞給六品頂戴六品軍功全喜等三十八名馬甲雙德等四十七名均著賞戴藍翎馬甲綽琿保等十二名明亮等十七名均著賞給六品頂戴另片奏請將隨同馬隊打仗出力各員獎叙並將前叅革職各員弁開復等語湖南長沙同知張由庚著開缺以知府留於湖南遇缺補用即選同知唐協和著賞換花翎已革



署醴陵縣知縣栗國華著開復原官並免繳捐復銀兩仍留湖南遇缺補用候選州判沈亨著免選本班以州同留於湖北遇缺即補布政使馬秀儒升任兩淮運使羅遵殿都司升用遊擊成福遊擊郭榮茂均著開復革職處分揀發叅將阿昌阿著賞還頂戴該部知道單片併發欽此同日又奉到

咸豐七年三月二十六日內閣奉

上諭官

胡林翼奏請將勦匪出力之委叅領賞加

勇號等語黑龍江領催委叅領富森保著賞給烏勒木濟特依巴圖魯名號欽此

謹將勦辦襄陽逆匪迭次打仗出力並生擒首  
逆之馬隊出力官兵擇尤酌擬開列清單恭呈

御覽  
懇

恩施  
優獎

計開

副都統銜護軍叅領舒保請

記名以副都統簡放

副總管訥依琿阿請以總管儘先補用先換頂



戴

吉林領催委叅領獎賞藍翎富珠哩委防禦金  
祥馬甲貴福黑龍江領催獎賞藍翎薩穆馬甲  
博陞額以上五名均請

賞換花翎

黑龍江領催委叅領富森保請

賞加勇號六品軍功馬甲德普西訥請  
賞戴花翎

黑龍江領催獎賞花翎委叅領諾明阿吉林領  
催委驍騎校獎賞藍翎明陞榮太以上三名均  
請以驍騎校儘先補用吉林馬甲儘先驍騎校  
補用獎賞藍翎托克托布請

賞給五品頂戴花翎

黑龍江馬甲獎賞藍翎扎明阿請以應升之缺  
升用吉林馬甲六品藍翎安冲阿黑龍江馬甲  
藍翎瓦爾哈山金清阿烏勒西遜以上四名均

請以驍騎校儘先陞用安冲阿並請

賞戴五品花翎

吉林五品花翎已保驍騎校桂連請以防禦陞  
用吉林馬甲六品藍翎魁春德慶黑龍江馬甲  
吉隆阿以上三名請以驍騎校陞用

粘桿處三等待衛忠齡請以二等待衛儘先補  
用黑龍江五品花翎農依布馬甲獎賞藍翎巴  
克唐阿巴里沁壽常五品藍翎岳隆阿以上五

名均請以驍騎校儘先升用岳隆阿並請

賞換四名頂戴花翎

京正黃旗護軍校已保委叅領桂昌請以副護  
軍叅領陞用

黑龍江領催藍翎德隆阿馬甲藍翎哈爾圖巴  
德琿阿巴音布尼壽七品軍功西凌阿以上六  
名均請

賞戴花翎



吉林前鋒委叅領雙福請以防禦補用  
吉林馬甲保陞來喜全勝德隆阿達豐阿以上  
五名請以驍騎校儘先升用  
書識湖北六品軍功揚鳳翥請以從九品不論  
雙單月歸部遇缺即選並請

賞給六品頂戴

吉林黑龍江六品軍功全喜等三十八名馬甲  
雙德等四十七名均請

賞戴藍翎又吉林黑龍江馬甲綽琿保等十二名明  
亮等十七名均請

賞給六品頂戴另行造冊咨部備案合併陳明

附奏懇將隨同勦辦襄鄖匪徒出力之同知  
張由庚等獎勵一片

再此次勦辦襄鄖匪徒隨同馬隊屢在前敵打  
仗尤為出力之管帶天津英勇委員湖南長沙  
同知張由庚擬請開缺以知府留於湖南遇缺  
補用即選同知唐協和請

賞換花翎又革職湖南署醴陵縣候選知縣栗國華  
請開復原官並免繳捐復銀兩仍留湖南遇缺



補用又候選州判沈亨請免選本班以州同留  
於湖北遇缺即補均出自

天恩謹附片具

奏伏乞

聖鑒訓示謹

奏咸豐七年三月十九日拜發四月初四日奉到  
硃批另有旨欽此錄於正摺之後

附奏懇開復北藩司馬秀儒等革職處分並  
給還叅將阿昌阿頂戴一片

再布政使馬秀儒陞任兩淮運使本任安襄鄖  
荆道羅遵殿護鄖陽鎮總兵官揀發叅將阿昌  
阿署襄陽城守營遊擊湖南古文坪都司陞用  
遊擊成福署提標右營遊擊襄陽城守營遊擊  
郭榮茂前因土匪滋事未能督飭妥速勦捕曾  
經 等先後

奏叅將馬秀儒羅遵殿草職留任阿昌阿摘去頂  
戴成福郭榮茂一併革職留任在案查匪衆竄  
擾樊城分股圍撲襄郡正值餉缺兵單情形危  
急之至馬秀儒誓必與城存亡力籌防堵會同  
羅遵殿身先士卒嬰城固守紳民感激奮興亦  
復同心捍禦遂使中原重鎮危而獲安有裨全  
局寔非淺鮮又阿昌阿保守鄖郡以固西秦門  
戶成福郭榮茂屢次打仗奮勇現復隨同馬步  
各軍生擒首逆多名均尚著有微勞功足抵過  
相應仰懇

天恩俯准開復馬秀儒羅遵殿成福郭榮茂草職處  
分並

賞還阿昌阿頂戴出自  
鴻施謹附片陳明伏乞

訓示遵行謹

奏咸豐七年三月十九日拜發四月初四日奉到



硃批另有旨欽此錄於正摺之後

附奏飭令頭等侍衛克興阿回京供職一片  
再查前年管帶馬隊來楚勦賊之

乾清門頭等侍衛副都統銜記名副都統克興阿所  
部吉林黑龍江馬隊二百餘名疊次打仗甚為  
得力嗣於克復武漢後陸續調赴前敵都興阿  
大營統帶克興阿仍隨大營現無緊要差委  
該員係

內廷差使未敢擅自久留相應一面

奏

聞即飭克興阿迅速起程回京供職又頭等待衛宗  
室奕榕現派隨荊州將軍綿洵在荊防堵刻下  
襄鄖逆匪殄除殆盡荆宜亦已肅清應即撤防  
俟奕榕回營後如無另有差委帶兵事件亦  
即發給咨文令其回京供職是否有當伏乞  
聖鑒訓示祇遵謹

奏咸豐七年三月十九日拜發四月初四日奉到

硃批克興阿奕榕均著來京欽此



奏黑龍江協領等缺揀選軍營出力人員請  
補一摺

奏為黑龍江協領等缺揀選軍營出力人員恭懇  
天恩分別補放仰乞

聖鑒事竊查黑龍江協領巴依爾呼蘭佐領密雅明  
阿各陞任遺缺應即遴選查有黑龍江正白旗佐領補  
人員內詳加遴選查有黑龍江正白旗佐領補  
用協領委營總巴克坦布歷次出師殺賊立功

應請以黑龍江協領之缺補授又密雅明阿所遺佐領一缺查有呼倫貝爾鑲白旗驍騎校已保防禦續保補用佐領委叅領巴彥都楞年富力強屢著戰功堪以擬補又巴克坦布所遺佐領一缺查有黑龍江正紅旗防禦委叅領即補佐領松英額久歷戎行曉暢營伍堪以擬補其所遺防禦一缺查有黑龍江布特哈正黃旗委防禦墨爾根布打仗奮勉堪以擬補又巴彥都

楞所遺驍騎校一缺查有布特哈鑲黃旗陞用驍騎校領催委叅領色楞棟魯普屢克堅城堪以擬補以上皆係儘先補用人員 與都興阿往返咨商意見相同伏懇

聖恩俯准分別補放以實營伍而示鼓勵除將該員等履歷分咨外謹會同江甯將軍都興阿恭摺具

奏伏乞



皇上聖鑒訓示謹

奏咸豐七年三月二十三日拜發四月初九日奉

到

硃批巴克坦布等依擬陞補欽此

附奏甯古塔協領員缺請以鑲白旗佐領祿  
昌等遞行陞補一片

再查吉林二起甯古塔協領德廉陣傷身故遺  
缺咨商都興阿於軍營出力人員詳加遴選  
查有已保儘先補用協領鑲白旗佐領委營總  
祿昌歷次出師戰功懋著所有甯古塔協領一  
缺應請即以祿昌擬補其所遺佐領一缺查有  
正黃旗防禦委叅領哈爾庫熟悉營務打仗奮

勇應請以佐領擬補所遺防禦一缺查有鑲藍  
旗驍騎校委叅領喜昌督隊出力堪以擬補其  
所遺驍騎校一缺查有鑲藍旗額外驍騎校領  
催委叅領金順打仗立功堪以擬補 詳擇軍  
營得力人員伏懇

聖恩俯准分別補放以資統率除將該員等履歷分  
咨外謹此會同都興阿附片陳明祇候

訓示遵行謹

奏咸豐七年三月二十三日拜發四月初九日奉  
到

硃批祿昌等依擬陞補欽此



附奏懇展緩例貢方物一片

再 前准內務府咨湖廣總督每年夏秋應例  
貢方物葛布茶葉蘄艾鄖耳食品等因時值武  
漢未復

奏請緩期採辦奉

硃批依議欽此欽遵在案茲屆夏季循例恭

進之期應即敬謹採辦惟查各項方物多係出產  
武黃所屬地方現雖一律肅清而頻年賊踪蹂

躡村市成墟商戶尚未復業仍未敢草率購辦  
致無以申誠敬而備

內用相應籲懇

天恩俯准暫行展緩一年容俟商貨輾集趕緊選購  
各品即行恭

進外謹附片陳明伏乞

聖鑒訓示謹

奏咸豐七年三月二十三日拜發四月初九日奉

到

硃批知道了欽此



會同北撫奏官軍踏平小池口沿山賊壘一摺

奏為北岍馬步各軍踏平小池口附近沿山賊壘  
斬首萬餘級連日攻剿大獲勝仗情形恭摺馳  
陳仰乞

聖鑒事竊照九江府與小池口兩岍賊匪堅城死守  
我軍設計圍攻疊獲勝仗情形前已馳  
奏在案近復探悉小池口下數十里與江西湖口

對峙之段窰楓樹均獨山鎮等處地方先後添  
築賊壘數十座外浚深濠藉為小池屏蔽以抗  
我師三月初九日寅刻江甯將軍都興阿先派  
營總薩林祿昌等帶馬隊二百騎會同都司石  
清吉步隊繞道馳赴小池口東路埋伏續派翼  
長多隆阿率領馬步各軍進剿段窰都興阿自  
領總管巴依爾呼蘭副將鮑超攻小池口城西  
以牽賊勢該逆先分三路撲出俱經鮑超擊退

而以一股往援段窰被薩林等伏兵前後掩殺  
斃賊無數維時多隆阿等甫至段窰見賊壘已  
成該逆又出衆數千列陣抗拒經營總窰雅明  
阿叅領穆精阿揮隊馳驟射斃騎馬賊目數名  
餘逆敗退立將賊壘十餘座毀平追殺至八里  
江斃賊千數百名溺死者無算生擒十五名據  
供著名頭目偽三十八檢點李逆等皆已殲斃  
奪獲器械鎗礮數百件騾馬多匹黃袍黃轎多



件此初九日剿平段窰賊壘之實在情形也十  
三日多隆阿等由黃梅馳至楓樹坳賊匪據山  
扼險築壘數里知我軍至賊分三路出拒各二  
三千人多隆阿亦分三路應之同副將王國才  
由中路進巴依爾呼蘭同提督孔廣順遊擊方  
映川由南路進祿昌等由北路直前逆衆抵死  
抗拒王國才等復分兵繞出山南賊壘之後擊  
斃守壘悍賊多名賊陣大亂紛紛潰竄巴依爾

呼蘭等分路掩殺生擒四十餘名追殺十餘里  
斬馘一千數百時已日暮多隆阿即傳令各軍  
就地埋鍋造飯乘勝追剿獨山鎮踞賊遂於十  
五日四鼓捲甲疾趨馳至獨山鎮之陶岍嶺地  
方賊匪沿山築壘七大座外環深溝護以樹椿  
竹籤多隆阿因仰攻不易遂商令孔廣順等以  
輕騎誘賊出巢而令馬步各隊分伏要隘時值  
月明如晝該逆見我軍隊伍星散率衆賊出壘

迎敵我軍且戰且退號礮一聲四路伏兵齊起  
馬隊縱橫衝殺賊勢披靡而多隆阿等又已潛  
令開化勇越濠拔樁躍登賊壘齊拋火蛋焚燬  
賊篷數百火光燭天賊衆狂竄我軍踏平賊壘  
奮力圍剿屍橫遍地又追殺二十餘里斃賊三  
千餘名先後逼水死者千餘名生擒正法者數  
百名多係偽將軍偽檢點之類天明收隊回營  
查點兵勇陣亡受傷者亦數十名此又十四五

等日剿平楓樹坳獨山鎮等處賊壘之實在情  
形也疊經都興阿孔廣順王國才咨稟前來查  
該逆堅守小池口堅城恃為九江犄角阻我東  
下之師現復於要隘添築堅壘為小池口援應  
若不迅速剿除該逆又得恃以為固茲經都興  
阿等連日攻剿踏平賊壘斃賊衆萬餘洵足  
以寒賊膽而挫克鋒刻下皖氛正熾楚北守禦  
門庭尤為要着除咨行水陸各軍嚴防要隘實



力攻剽務將九江及小池口尅日得手並飭臬  
司李孟羣趕急督師赴皖仰紓

宸厯外謹將北岍官軍踏平小池口附近賊壘連日  
大獲勝仗情形會同江甯將軍都興阿署提臣  
前鄖陽總兵官訥欽恭摺由驛六百里馳

奏伏乞

皇上聖鑒訓示謹

奏咸豐七年三月二十八日拜發四月十二日奉

到

硃批另有旨欽此同日奉到咸豐七年四月初五日

內閣奉

上諭官 胡林翼奏官軍踏平小池口附近沿山賊  
壘連獲大勝各一摺九江對岍小池口下數十里  
之段窰楓樹坳獨山鎮地方先後添築賊壘數十  
座與小池口賊犄角抗拒三月初九日將軍都興  
阿派翼長多隆阿率領馬步各軍進剿段窰賊壘

並令營總薩林等分路埋伏自督總管巴依爾呼  
蘭副將鮑超攻小池口賊分三路出撲經鮑超等  
奮勇擊退其分股往援段窰之賊亦經薩林等伏  
兵截殺斃賊無數多隆阿等直抵段窰賊衆迎拒  
營總密雅明阿等揮隊馳驟射斃騎馬賊目數名  
賊衆奔潰立將賊壘十餘座毀平追至八里江斃  
賊千數百名溺死者無算生擒十餘名十三日復  
由黃梅縣馳至安徽宿松縣屬之楓樹坳賊壘數

里分路出拒多隆阿令副將王國才等亦分路進  
擊王國才復分兵繞出賊後擊斃守壘悍賊多名  
賊衆大亂巴依爾呼蘭等分投掩殺斬馘一千數  
百餘名生擒四十餘名當將楓樹坳賊壘焚毀遂  
於十五日夜乘勝馳至宿松縣屬之獨山鎮地方  
賊壘沿山七大座深溝密榛多隆阿派兵分伏要  
隘提督孔廣順等輕騎誘賊賊果出敵時值月明  
伏兵齊起馬隊縱橫衝殺多隆阿令開化勇潛越



賊濠拔樁登壘先將賊大壘一座焚燒餘壘賊皆  
驚竄我軍乘勢剿殺斃賊三千餘名追殺二十餘  
里逼水死者又千餘名獨山鎮賊壘亦悉數踏平  
此次剿平小池口附近賊壘追至宿松先後斬擒  
賊首萬餘級辦理甚屬得手著官等即飭帶兵  
各員乘茲銳氣迅克小池口並九江府城以遏賊  
衝所有出力員弁兵勇著官胡林翼會同查明  
併歷次獲勝出力人等彙案保奏候朕施恩欽此

奏委員設局趕辦北岸軍需銷算一摺  
奏為北岸大營軍需銷算遴員設局趕辦恭摺

具陳仰祈

聖鑒事竊自咸豐五年夏間由荊州起行督師勦  
賊嗣克復德安提兵東下掃除襄河兩岍各州  
縣逆氛於去冬攻克武漢黃州後力籌節餉裁  
撤兵勇議將北岸追勦留防各軍糧餉等項  
於六年十二月三十截止以後概行歸併省城

總糧臺支發以節糜費前經附片

奏報欽奉

硃批所辦甚妥欽此維時藩司馬秀儒遠駐襄陽尚  
未來省而軍需款項紛繁驟難剋期銷算並經

籲懇

聖恩准俟武漢善後大綱粗定起限辦理在案茲於  
四月初一日在省設立總局為始查有候補道  
文輝廉明公正辦事結實委令會同馬秀儒督

率承辦局員將北岸各路馬步兵勇及戰船水  
師先後月支糧餉並添辦軍裝帳房及浚濠築  
壘採運麩料夫價水脚等項覈寔勾稽造具收  
支總散報銷各冊逐案

題銷並飭將前督臣台湧揚需等任內經手餉項  
各歸各任分案造報外謹將委員設局趕辦北  
岸軍需銷算緣由繕摺具

奏伏乞



皇上聖鑒訓示謹

奏咸豐七年四月初三日拜發十九日奉到  
硃批知道了欽此

附奏北岸兵勇鹽糧每名月給銀三兩六錢  
一片

再北岸兵勇鹽糧先經前督臣台湧

奏明每兵勇連隨丁等項月支銀三兩三錢嗣楊  
需接任因鹽糧昂貴兵勇食用實有不敷紛紛  
求增經楊需按丁按日量加銀一分共月支銀  
三兩六錢 接任後正值武漢三陷各屬地方  
疊遭蹂躪兵行所過食物倍貴勢不能不循照

所增支給以作士氣伏查軍興以來各路兵勇  
月支鹽糧多寡不同如前安徽撫臣江忠源議  
給隨征勇丁月支銀五兩及四兩八錢不等又  
兵部侍郎曾國藩議給每勇月支銀四兩五錢  
蒙

恩允准所有楚省北岸兵勇按月量增銀一分計月  
支三兩六錢雖較台湧原議稍增而較江忠源  
等支發之數實多節省查揚需先因兵潰案卷

不全未經具

奏而任內復因餉源不繼未能按月支放節欠  
口糧前後套搭僅就外省及本屬解到之餉酌  
量隨時湊撥濟其饑困致難按期截數

奏報迨武漢克復遣撤兵勇覈計節欠口糧至數  
十日或兩三月之久無項補領僅按其欠數多  
寡量予裁給數成以資回籍盤費此又欠餉未  
能照數補足設法籌辦之實在情形也除一律



覈實造報仍將短發口糧銀數於冊內分晰登  
明外謹據寔陳明伏乞

聖鑒訓示施行謹

奏咸豐七年四月初三日拜發十九日奉到

硃批戶部知道欽此

附奏請揀發副叅等員來楚一片

再前議整飭兩湖營務慎選將領縷悉陳

奏奉

硃批所慮極是均照所擬辦理欽此數月以來於  
所屬武員詳加察訪或材堪任使人地相宜或  
庸懦無能或防勦不力已隨時分別

奏叅辦理在案茲查北省副將叅遊等員不敷差  
委相應附片具

奏仰懇

聖恩敕部遴選曾經出師曉暢營伍之副將一員叅將二員遊擊二員都司二員呈請

揀發來楚以資差委庶於營務有裨伏候

訓示祇遵謹

奏咸豐七年四月初三日拜發十九日奉到  
硃批著照所請行兵部知道欽此

奏報荆宜二局咸豐六年九十等月抽提鹽  
課數目一摺

奏為查明上年九十等月分荆宜二局抽提川鹽  
課項銀錢數目恭摺

奏報仰乞

聖鑒事竊照湖北荆宜二府分設川鹽局卡抽課濟  
餉前准部咨行令將抽收課銀數目按兩月一  
次專摺



奏報所有上年五六七八等月分抽收鹽課銀錢  
數目業經專摺具

奏在案茲飭據荆宜施道莊受祺署荊州府同知  
候補知府鄭蘭將上年九十十一十二等月分  
抽收鹽課銀錢數目開報前來 覆加查覈宜

昌鹽局九十等月分共抽收課銀二萬四千三百二十八兩八錢三分又十一十二等月分共  
收提課銀三萬七千零三分五釐又荊州鹽局

九十等月分共收課錢六萬九千零六十七串  
六百八十三文又十一十二等月分共抽收課  
錢七萬二千六百六十二串二百三十三文五  
毫以上四個月荆宜二局共抽課銀六萬一千  
三百二十八兩八錢六分五釐制錢一十四萬  
一千七百二十九串九百一十六文五毫除撥  
發荊州滿營及宜昌各營官兵月餉其餘銀錢  
俱隨時解濟軍需惟查楚北借銷川引現因川

省復加稅額成本愈重商販愈稀旋值襄樊土  
匪滋事近逼荆宜雖設法招徠未能如前踴躍  
除嚴飭該承辦道府隨時認真經理以期日有  
起色源源解濟所有支解細數另行造冊咨部  
外謹將荆宜二局抽提川鹽課項銀錢數目專

摺

奏報伏乞

皇上聖鑒訓示謹

奏咸豐七年四月初三日拜發是月十九日奉到  
硃批戶部知道欽此



會同北撫奏覆九江一軍無可抽撥並懇留  
王國才暫緩赴滇一摺

奏為遵

旨復奏仰乞

聖鑒事臣等於咸豐七年三月二十日欽奉

上諭福興文俊奏兵力不敷請添調北路勁兵一摺  
湖北水陸兩軍在九江者數幾二萬既據福興咨  
商官等於李續賓所帶兵勇內分調數千名即

著官 胡林翼斟酌速辦如九江即可克復固應分兵協濟若攻克需時亦應移緩就急酌量抽調

欽此又於三月二十六日欽奉

上諭楚北水陸各兵均已乘勝東下王國才正在黃梅小池口一帶剿賊自係帶兵得力之員惟滇省現當剿辦回夷各匪尚未得手較楚省尤為喫重著官 胡林翼即飭該署總兵前往滇省交恒春調遣藉資熟手欽此 臣等查曾國藩先後來咨江

西內地兵勇數盈五萬而並無可籌之餉是江西之軍情其患不在兵少又查李續賓本營六千人益以臣之仁字四營護軍四營凱字一營亦不過萬人疊據李續賓來稟分圍九江已得三面其東路鎖江樓白水湖一帶尚屬空虛請益師四千人臣尚無以應也是九江之軍情其患正在兵少臣嘗游於江南自荆襄至於武漢水程千里自武漢至於九江水程五百里九江



之於金陵風利五日可至吳楚緊要關鍵賊得之可以犯湖北與江西官軍得之可以圖皖口與金陵固東南形勢之要所當視為先務者矣昔吳臣紀陟言長江五千七百里疆界雖遠而險要必爭之地不過數四猶人有六尺之軀其護風寒亦祇數處所謂險要必爭之地不過荆襄武漢九江湖口耳是今日討賊之略必先注意江面而後江西之門戶可保江南之全局可

圖又據李續賓劉騰鴻來稟瑞州之賊勢已大蹙克復瑞州則兵力可分若此時調兵分剿撫建分兵少則力不敵賊分兵多則九江已空恐賊得乘虛以犯南昌兼援瑞州更於江西大局有損官臣胡林翼往返劄商九江一軍實屬無可抽撥至小池口石城賊所恃為犄角者也正月以來臣派鮑超以五千人扼小池口歸都興阿調遣疊次攻堅士卒中傷六百餘人鮑

超亦身受四傷其王國才一軍三千餘人經都  
興阿派駐黃梅進剿宿松自桐城兵潰廬州告  
警皖省之賊勢復熾臬司李孟羣帶勇二千五  
百人由湖北羅田取道六安甫於三月二十六  
日起程昨准都興阿飛咨桐城之賊約三萬人  
大舉上犯下游兵力不敷咨調派防襄陽之馬  
隊並臣所部寶營義營迅速馳赴宿松助剿是  
皖省之兵事方殷急應力遏兗鋒相機進剿鄂

省兵力全勢注於下游非僅防其上犯實欲因  
勢乘便進剿江皖也惟據都興阿咨開鮑超帶  
傷甚重應給假在營調養暫委都司喻吉三代  
管營務提督孔廣順所部不滿千人兼以傷病  
舉發難以逐日出隊王國才獨當一路所部三  
千餘人急切無人統帶皖省邊界軍務喫緊未  
便遽易生手惟有仰懇

皇上天恩暫留王國才進剿皖省實於北岍軍務有



所裨益所有遵

旨復奏緣由合詞恭摺五百里馳  
奏伏乞

皇上聖鑒訓示謹

奏咸豐七年四月初五日拜發是月十九日奉到  
硃批覽奏均悉着照所議欽此

會同北撫奏遵保剿辦襄鄖賊匪尤為出力  
人員一摺

奏為遵

旨查明剿辦襄陽賊匪疊獲勝仗殲擒首逆並固守  
襄郡城池尤為出力之文武員弁兵勇覈實酌  
擬繕列清單籲懇

天恩優獎仰祈

聖鑒事竊 等前將襄陽首逆就擒專摺馳

奏嗣奉

上諭出力員弁擇尤保奏等因欽此欽遵仰見我  
皇上垂念戎行微勞必錄之至意當即傳知各軍將  
士齊聲感誦莫可名言伏查襄陽首惡高二先  
等以烏合之衆逞梟逆之謀攻城掠野勢極披  
猖經 等先後派已革鹽法道常恩陞用道唐  
訓方等率領馬步各軍水師礮船赴襄剿辦並  
即指授機宜以首固襄樊根本嚴扼西北竄踪

尤為要着一面飛飭布政使馬秀儒等嚴密守  
禦保全襄郡嗣常恩等分馳而進截下竄宜城  
之賊速解襄郡之圍乘勝克復樊鎮大戰於襄  
屬之紅綾清河等舖力遏兇鋒堵其北嚮復追  
剿穀城之僊人渡攻克光化之老河口擒斬匪  
黨不可數計時唐訓方於老河口要隘留駐一  
軍控制襄樊而以常恩暨松潘鎮總兵德恩親  
率所部進擊均州匪黨解其城圍克復房竹等



縣城池窮搜山谷歷鳥道羊腸之險節節剿捕  
斬馘計數千衆嗣偵知大股劉尚義等由興山  
擾及宜昌折竄荆門常恩等復分軍圍逼盡驅  
入南漳之武安堰以蹙之適統領之副都統銜  
巴揚阿同知唐協和等各軍齊至連戰皆捷劉  
尚義等遂率衆棄械投誠分別斬釋留遣而另  
股首惡高二先等兇狡尤甚復經唐訓方等會  
合兜剿將該首逆悉數生擒就戮餘黨亦殲除

殆盡此節次剿辦疊經

奏報之情形也等以大股甫經剿平地方漸臻

綏靜而襄樊五方雜處素為匪類出沒之區又  
值年荒穀貴遣散逃匿餘匪難免散而復聚是  
以前摺聲明酌留馬步兵勇以資鎮撫現仍飭  
各屬實力搜捕不准漏網以杜後患而靖地方  
所有在事文武員弁兵勇或臨敵衝鋒或登陴  
固守而節次入山血戰之將士備歷艱險掃蕩

逆氛均屬著有微勞除馬隊前經隨摺開列已蒙

恩獎外茲將步隊水師員弁兵勇遵

旨查明擇其尤為出力者覈實酌擬繕列清單恭呈御覽伏候

天恩優獎以昭激勸謹會同署提臣前鄖陽鎮總兵官訥欽恭摺具

奏伏乞

皇上聖鑒訓示謹

奏咸豐七年四月十九日拜發五月初六日奉到硃批另有旨欽此同日奉到咸豐七年四月二十七

日內閣奉

上諭官 胡林翼奏遵保剿辦襄陽匪徒及守城出力員弁兵勇開單呈覽一摺湖北襄陽匪徒竄擾郡城蔓延屬縣經官 等調派兵勇分投搜剿在事員弁兵勇或奮勇衝鋒或登陴固守均屬著有



微勞自應量加鼓勵湖北武昌城守營叅將扎拉罕着賞加副將銜湖南都司陞用遊擊成福着免補遊擊以叅將歸湖北湖南遇缺儘先補用揀發叅將阿昌阿着賞戴花翎都司錢得勝唐文山守備唐敏興千總唐蒸雲均着賞換花翎守備鄧茂先李有恒均着免補本班以都司儘先陞用千總陳道富李元興李菊生尹澤鰲均着以守備儘先陞用把總陳忠仁李德彥秦三元李文山康立福

鄒世瑞楊士允鄧虎賁均着以千總儘先補用鄧虎賁並着賞加守備銜軍功唐鏡心唐訓邦呂聲和監生鄒世範均着以從九品未入流不論雙單月儘先選用唐鏡心並着賞戴藍翎生員吳佑棠着以訓導儘先選用並賞戴藍翎貢生八旗教習羅榮緒着以知縣不論雙單月選用廩生宋瑛着以訓導不論雙單月選用候選從九品富隆武着以知縣不論雙單月遇缺選用並賞換五品頂戴

花翎儘先千總黃祥林千總馬長得均着以守備  
遇缺儘先補用把總黃開榜教天印吳連春牛萬  
陞何興榜均着以千總儘先拔補馬長得黃開榜  
均着賞換花翎牛萬陞何興榜並着賞給五品頂  
戴吳連春並着賞戴藍翎儘先守備蕭長林着免  
補守備以都司遇缺儘先補用外委黃效忠曾正  
明均着以千總拔補並賞給五品頂戴記名千總  
蔡太學着以千總拔補並賞加守備銜賞換花翎

把總王得釗着以千總拔補並賞換花翎候選府  
經歷縣丞顧廷薰着免選本班以通判不論雙單  
月分缺先選候選鹽知事唐華封着免選本班以  
鹽大使不論雙單月遇缺選用並賞給六品頂翎  
五品軍功馬有功着以守備儘先選用並賞換四  
品頂戴花翎銜千總銜唐華蔚着以銜千總遇缺  
即選並賞戴藍翎從九品銜羅瀛才着賞加州同  
銜俊秀朱心培着以縣丞不論雙單月分缺先用



候選訓導吳廷耀段映斗均着以府經歷縣丞不  
論雙單月選用候選布政司經歷常忠洛着賞戴  
藍翎軍功王修誠着以從九品未入流即選並賞  
戴藍翎文童董承惠着以縣主簿不論雙單月即  
選千總周宗選把總朱長生張殿甲均着以守備  
補用候補千總陶得琳周玉春均着賞加守備銜  
把總蕭承桂着賞給五品頂戴藍翎把總田達三  
薛添寶外委張如貴均着以千總拔補外委盧福

元着以千總儘先拔補並賞加五品銜賞換花翎  
候補知州杜嘉善着賞換花翎興國州州判鄧師  
韓隨州州判陳楨均着開缺以知縣仍留湖北遇  
缺即補並賞加五品銜賞戴藍翎候補縣丞程光  
第着免補本班以知縣留於湖北補用試用未入  
流顏培成着免補本班以縣丞留於湖北遇缺前  
先補即選知縣任信成着免選本班以直隸州知  
州分發直隸儘先補用教授司效徽訓導陳中欽



教諭方新運均着以應陞之缺陞用從九品銜馬  
肇着以從九品未入流不論雙單月儘先選用候  
選訓導馬秀士着賞加同知銜監生陳書謨着以  
府經歷縣丞不論雙單月遇缺前先選生員汪慧  
增着以訓導即選候選未入流姚清臣着以府經  
歷縣丞儘先選用並賞給六品頂翎軍功李芳馨  
李芳策李芳體文童劉學源均着以從九品選用  
軍功李崇祿着以從九品遇缺前先選用並賞給六

品頂翎未滿吏胡廷徽着以主簿不論雙單月選  
用俊秀程象三閔長清周樹堂王繼周均着以從  
九品未入流不論雙單月儘先選用周華三周澍  
傅和莽鄒慎思方穀周金章張秉揚均着賞給從  
九品職銜候選縣丞常毓坤着以知縣留於陝西  
儘先補用候選從九品紀闕銓着留於湖北儘先  
補用候補從九品袁鳴珂着免補本班以府經歷  
縣丞儘先補用外委曹華山袁玉光均着以把總



補用並賞戴藍翎周盛鰲等八名均着以把總補用軍功陳道祥等十三名均着以外委儘先拔補並賞戴藍翎賀澤球等二十六名均着以外委儘先陞用姚正祥等二名把總陳仁富等六名均着賞戴藍翎軍功劉昭意着以外委拔補並賞戴藍翎吳盛楚等二十五名均着以外委拔補外委陳貽寬等十二名軍功雷玉貴等二名均着賞戴藍翎監生劉憲着以府經歷縣丞留於湖北補用五

品頂戴把總丁鳴岐着賞戴花翎外委鄭廷魁軍功滕國用均着賞戴藍翎外委袁泰來等六名均着以把總陞用軍功高鵬程着以把總儘先陞用並賞加六品頂戴額外胡文元着以把總儘先拔補並賞戴藍翎把總張有泰等二十八名均着以外委分別儘先拔補額外張光照等八名均着以外委拔補並賞戴藍翎兵丁洪秉忠着以外委儘先拔補並賞給六品頂戴軍功徐開甲等五名均

着以額外儘先補用雲騎尉李鴻源外委靳玉書  
及軍功兵丁等四十八員名均着賞戴藍翎軍功  
辛占元着以把總歸河南省標遇缺拔補外委李  
林山武生謝光甲均着以把總拔補並賞戴藍翎  
軍功方順等三名武童徐萬清均着以把總拔補  
軍功范得勝等二十五名均着以外委拔補並賞  
戴藍翎另片奏布政使馬秀儒守禦有方署鄖陽  
府事揀發知府恩祥捐資修城防堵得力懇請獎

勵等語馬秀儒恩祥着賞戴花翎該部知道單片  
併發欽此



謹將剿辦襄鄖賊匪疊獲勝仗殲擒首逆並保  
守襄陽郡城尤為出力文武員弁兵勇遵

旨查明覈實酌擬繕列清單恭呈

御覽伏候

天恩優獎

計開

湖北武昌城守營叅將扎拉罕請

賞加副將銜

湖南古丈坪都司陞用遊擊成福請免補遊擊  
以叅將兩楚遇缺儘先補用

代理鄖陽鎮總兵官事務揀發叅將阿昌阿請

賞戴花翎

正副訓營藍翎都司錢得勝唐文山藍翎守備  
唐敏興千總唐蒸雲四名均請

賞換花翎

藍翎守備鄧茂先李有恒請免補本班以都司

儘先陞用

藍翎千總陳道富李元興李菊生尹澤鰲四名  
均請以守備儘先陞用

藍翎把總陳忠仁李德彥秦三元李文山康立  
福鄒世瑞楊士允鄧虎賁八名均請以千總儘  
先補用鄧虎賁並請

賞加守備銜

五品軍功唐鏡心六品軍功唐訓邦八品軍功



呂聲和監生鄒世範均請以從九品未入流歸部不論雙單月儘先選用唐鏡心並請

賞戴藍翎

五品軍功生員吳佑棠請以訓導儘先選用並請

賞戴藍翎

隨州優貢八旗教習羅榮緒請以知縣歸部不論雙單月選用廩生宋瑛請以訓導不論雙單

月選用

六品藍翎候選從九品富隆武前在漢陽打仗屢著戰功擬保府經歷縣丞未經出

奏今併案保獎請以知縣歸部不論雙單月遇缺選用並請

賞換五品頂戴花翎

五品藍翎儘先千總黃祥林宜昌鎮標藍翎千總馬長得均請以守備遇缺儘先補用藍翎把

總黃開榜教天印吳連春牛萬陞何興榜均請  
以千總儘先拔補馬長得黃開榜請

賞換花翎牛萬陞何興榜二員並請

賞給五品頂戴吳連春請

賞戴藍翎

湖北撫標千總儘先守備蕭長林請免補守備  
以都司遇缺儘先補用外委黃效忠曾正明均  
請以千總拔補並請

賞給五品頂戴

記名千總藍翎蔡太學藍翎把總王得釗均請  
以千總拔補蔡太學並請

賞加守備銜換戴花翎王得釗請

賞換花翎

候選府經歷縣丞顧廷薰請免選本班以通判  
歸部不論雙單月分缺先選

候選鹽知事唐華封請免選本班以鹽大使歸



部不論雙單月遇缺選用並

賞戴六品藍翎

五品軍功馬有功請以守備儘先選用並請

賞換四品頂戴花翎

衛千總銜唐華蔚請以衛千總遇缺即選並請

賞戴藍翎

軍功善叢請以門千總歸部儘先選用並請

賞戴藍翎

從九品銜羅瀛才請

賞加州同銜

俊秀朱心培請以縣丞歸部不論雙單月分缺先用

候選訓導吳廷耀段映斗均請以外府經歷縣丞歸部不論雙單月選用

候選布經歷常忠洛請

賞戴藍翎

六品軍功王修誠請以從九品未入流歸部即  
選並請

賞戴藍翎

文童董承惠請以縣主簿歸部不論雙單月即  
選

提標等營千總周宗選把總朱長生張殿甲均  
請以守備補用又候補千總陶得琳周玉春二  
名請

賞加守備銜

提標等營六品頂戴把總蕭承桂請

賞給五品頂戴藍翎又把總田達三薛添寶外委張  
如貴均請以千總拔補藍翎外委盧福元一名  
請以千總儘先拔補並請

賞加五品銜換戴花翎

湖北候補知州杜嘉善請

賞換花翎



興國州州判鄧師韓隨州州判陳楨均請開缺  
以知縣仍留湖北遇缺即補均請

賞加五品銜並戴藍翎

候補縣丞程光第請免補本班以知縣留於湖  
北補用

試用未入流顏培成請免補本班以縣丞留於  
湖北遇缺前先補

即選知縣任信成請免選本班以直隸州分發

直隸儘先補用

襄陽府學教授司效徽訓導陳中欽縣學教諭  
方新運均請以應陞之缺陞用

山東安邱縣從九品銜馬肇請以從九品未入  
流歸部不論雙單月儘先選用

候選訓導馬秀士請

賞加同知銜

浙江監生陳書謨請以外府經歷縣丞歸部不

論雙單月遇缺前先選

安徽生員汪慧增請以訓導即選

候選未入流姚清臣請以外府經歷縣丞歸部  
儘先選用並

賞戴六品藍翎

安徽六品軍功李芳馨李芳策湖南文童劉學  
源八品軍功李芳體四名均請以從九品歸部  
選用

六品軍功李崇祿請以從九品歸部遇缺前選  
用並請

賞戴六品藍翎

六品軍功未滿典吏胡廷徽請以主簿歸部不  
論雙單月選用

俊秀程象三閔長清周樹堂王繼周請以從九  
品未入流歸部不論雙單月儘先選用

俊秀周華山周澍傅和荈鄒慎思方穀周金章



張秉揚均請

賞給從九品職銜

前任陝西華陰縣典史候選縣丞常毓坤請以  
知縣仍留陝西儘先補用

六品藍翎監生劉憲請以府經歷縣丞留於湖

北補用

候選從九品紀關銓請留於湖北儘先補用

候補從九品袁鳴珂請免補本班以府經歷縣

丞儘先補用

南勇正訓營外委曹華山袁玉光二名請以把

總補用並請

賞戴藍翎又外委周盛鰲等七名襄陽外委楊春華

一名均請以把總補用又六品軍功陳道祥等

十三名均請以外委儘先拔補並均請

賞戴藍翎又六品軍功賀澤球等二十六名均請以

外委儘先陞用又六品軍功姚正祥張正榮二

名把總陳仁富等六名均請

賞戴藍翎另行造冊咨部

南勇副訓營六品軍功劉昭意請以外委拔補  
並請

賞戴藍翎又六品軍功吳盛楚隊長王興華六品軍  
功周盛高等二十五名均請以外委拔補又外  
委陳貽寬等十二名寶營六品軍功雷玉貴曹  
玉堂二名均請

賞戴藍翎仍另行造冊咨部

四川夔協鹽廠營五品頂戴把總丁鳴岐請

賞戴花翎

湖北督標左營經制外委鄭廷魁六品軍功勝  
國用均請

賞戴藍翎

襄陽等營外委袁泰來李芳培等六名均請以  
把總陞用又軍功高鵬程請以把總儘先陞用



並請

賞加六品頂戴額外胡文元請以把總儘先拔補並請

賞戴藍翎仍另行造冊咨部

提標等營把總張有泰等二十八名請以外委分別儘先拔補又額外張光照等八名請以外委拔補並請

賞戴藍翎又馬兵洪秉忠請以外委儘先拔補並請

賞給六品頂戴軍功徐開甲等五名請以額外儘先補用又雲騎尉世職李鴻源一名外委靳玉書等四名六七品軍功及馬兵朱得陞等四十三名均請

賞戴藍翎仍另行造冊咨部

河南軍功辛占元請以把總仍歸河南省標遇缺拔補又外委李林山武生謝光甲均請以把總拔補並請

賞戴藍翎又軍功方順陳發科楊逢春武童徐萬清  
均請以把總拔補六品軍功范得勝張靖元等  
二十五名均請以外委拔補並請

賞戴藍翎仍另行造冊咨部

附奏懇將力籌防堵保全城池之藩司知府  
獎勵一片

再湖北布政使馬秀儒老成練達正直有聲前  
於襄郡瀕危晝夜登陴守禦以一腔忠義之誠  
賈萬姓勇敢之氣郡垣安堵士庶歡騰嗣馬秀  
儒奉調晉省紳民遮道攀留皆感泣而不忍其  
去具見惠政及民實堪嘉尚又署鄖陽府揀發  
知府恩祥當匪徒竄擾房竹閣郡震驚恩祥鎮



靜撫馭嚴密籌防使該匪無由直犯鄖郡兼固  
陝省藩籬又因郡城年久坍塌經費無出恩祥  
倡捐多資先期籌修完固藉資保障均屬實心  
任事可否請將馬秀儒恩祥二員仰求

天恩賞戴花翎以示優獎出自

聖裁伏乞

訓示謹

奏咸豐七年四月十九日拜發五月初六日奉到

硃批另有旨欽此錄於正摺之後

附奏襄陽紳民齊團剿賊懇加廣學額以示  
鼓勵一片

再襄郡為南北咽喉中原重鎮大局安危所關  
綦重上年九月內襄屬逆匪滋事疊次攻撲郡  
城維時武漢赴援兵勇尚未抵襄經布政使馬  
秀儒等率同文武員弁力籌守禦而在城紳民  
亦復奮臂同呼晝夜登陴固守擊退賊衆危而  
獲安其四鄉紳民亦皆分地齊團協同兵勇截



剿匪黨擒斬多名遂使該逆等不敢復擾樊城  
窺伺襄郡嗣即元惡就擒尅期歲事固由將士  
仰賴

天威大張捷伐亦藉紳民同仇敵愾固我藩籬楚北  
軍興日久賊氛所至類皆避地藏身甚或蓄髮  
輸資偷生從逆求其民有固志而不可得如襄  
陽之衆志成城深明大義者實屬少有人數衆  
多未便盡給鼓勵合無仰懇

天恩逾格賞准襄陽一縣加廣文武學額各二名永  
為定額以風頽俗而勵羣倫益昭

聖世棧樸作人之化感戴

隆施曷有既極據藩司馬秀儒具詳前來謹會同學  
臣馮譽驥附片陳明伏乞

訓示施行謹

奏咸豐七年四月十九日拜發五月初六日奉到  
硃批另有旨欽此同日奉到咸豐七年四月二十七

日內閣奉

上諭官 胡林翼奏紳民守城出力請加文武學額等語湖北襄樊匪徒於上年九月疊次攻撲襄陽縣城該紳民等登陴固守力保危城四鄉團練均能協同兵勇殲賊多名洵屬深明大義敵愾同仇所襄陽縣文武學額着永遠加廣各二名以示鼓勵該部知道欽此

附奏懇留降補守備常勝在楚差委一片

再湖北營務前經 瀝陳積弊力籌整飭已會

同署提臣訥欽詳查庸劣員弁次第懲辦先後奏報在案查楚省先前揀發副將叅遊都司等官或已補缺或經陣亡或經叅劾而屢保前敵得力人員一經克復九江即當隨征東下又 現請揀發武員一時未能尅期到省應請

敕下部臣速催來楚以備任使此現在北省營務乏



員之情形也茲查有貴州遵義協副將降補守  
備三等輕車都尉常勝由三等侍衛歷陞頭等  
侍衛續由辦事章京於道光二十六年陞授月  
缺副將因案革職後督帶練勇會合官兵屢次  
打仗獲勝欽奉

上諭常勝尚知愧奮着以守備降用欽此嗣因追賊  
墜馬跌傷右腿委驗調治就痊由雲貴督臣恒  
春給咨送部引

見路過楚省謁見 據該降員稟稱世祿世僕渥荷  
聖恩拳養未報涓埃願在楚隨營力圖報効 察其  
語出至誠淚隨聲下查常勝現年五十二歲年  
力正強於外省營伍情形亦為熟諳曾與 在  
京同旗當差稔知其人心地篤實明白有為現  
係送部引

見之員似與銓選省分實缺不同可否仰乞  
天恩俯准暫留楚北差委 仍隨時詳查如能得力

再當籲懇

恩施倘難堪錄用亦即給咨回旗充當世職 斷不  
敢稍涉瞻徇除雲貴督臣咨文先行送部查銷  
外 因整飭武備乏員差委起見未敢擅專謹  
據實附陳伏乞

皇上聖鑒訓示祇遵謹

奏咸豐七年四月十九日拜發五月初六日奉到  
硃批另有旨欽此同日奉到咸豐七年四月二十七

日內閣奉

上諭官 等奏請飭催揀發武員等語現在湖北武  
職差委之員所有前次官 等奏請揀發副將等  
官着兵部迅速辦理引見後即飭該員等趕緊起  
程毋許逗遛欽此又奉到咸豐七年四月二十七  
日內閣奉

上諭官 等奏請留守備差委等語貴州降補守備  
三等輕車都尉常勝着准其留於湖北交官 差



遣委用如不得力仍着撤令回旗該部知道欽此

會同北撫奏皖賊上犯楚界移調各營迎剿  
大獲勝仗一摺

奏為皖賊上犯蘄州蘄水邊界調兵赴援並移調  
九江小池口各營連獲大勝情形由六百里馳  
奏仰乞

聖鑒事 等疊准江甯將軍都興阿來咨及安徽藩  
司李孟羣稟稱皖省賊匪併力上犯又分道竄  
入黃梅廣濟蘄州蘄水羅田五州縣邊界希圖

梗截大營後路併以阻遏援皖之師路歧賊衆防不勝防亟應厚集兵力以資堵剿等語等再四籌商實無可增之兵而警報紛來不能不移緩救急當抽調記名臬司李續賓統帶之湘左營湘右營前仁營一千五百名渡江駐小池口而以原駐小池口鮑超五營分移孔壠黃梅其蘄州羅田一帶則調興國防兵福武寶三營渡江應援恭鳳二營繼之又由省調虎營六百

人助剿李孟羣援皖之師則由羅田直抵英山遏其上竄四月十八日同知銜候選知縣李景湖率福營都司金殿安率前左寶營守備余雲龍率武營由青石嶺大路署蘄州知州彭應鯉都司盧又能等率羅田勇由王家壩小路同攻張家塆賊與青石嶺官軍相持羅勇抄後夾擊盧又能督勇接應大勝之斃賊千餘名內有偽指揮一名奪獲刀矛旗幟資糧無算十九日賊



大股來犯福武寶三路分進而賊又分七路來  
衝李景湖率勇直前斬悍賊數名賊稍卻而七  
路之賊漫山遍野寶武二營為賊隔截李景湖  
率守脩銜藍翎千總張鵬高楊高桂把總胡開  
禮六品翎頂朱大倫銜突鏖戰衆寡不敵同時  
陣亡營勇亦亡二百餘名叅將張寅恭揮兵迎  
擊福武寶三營又回兵合攻斃騎馬賊二名殺  
步賊數十名賊始敗退我軍追五六里而返二

十日叅將葉永泰率虎營至二十一日都司徐  
統恩自興國率鳳營亦至是日卯刻賊於河北  
分六股河南分八股約萬餘衆各營堅壁以待  
賊數次誘戰相持不動日午賊懈始尾追之頗  
有斬獲二十二日賊又分股萬餘由芑茅街竄  
撲夫子嶺二十三日蘄州青石嶺各營因營官  
戰歿軍中無錢購米忍饑一晝夜勇丁稍有潰  
失其不潰者退保蘄州臣胡林翼飛調候補知

府邢高魁由興國渡江一面籌運米石飭令重  
加整頓力扼蘄州又加派都司段清平張志超  
率平超二營一千二百人由省疾趨黃州會同  
署黃州府許賡藻署黃岡縣黎道鈞扼蘄水上  
竄之路官先期調襄陽馬隊百人回援因  
記名副都統舒保有功於襄陽士民遮道挽留  
遲至四月十五日始率其所部百人起程副都  
統銜巴揚阿遣散川勇甫抵宜昌檄令迅速回

援此四月十八日至二十三等日皖賊上犯蘄  
羅互有勝敗並抽調救援之情形也都興阿駐  
下游陸家嘴偵知賊竄黃梅縣屬之亭前驛渡  
河橋一帶隨派多隆阿率馬隊往剿二十日賊  
分三路各萬餘來撲縣城多隆阿同王國才及  
各營總分路擊之馬隊踰濠越嶺追賊過河毀  
賊壘二座忽賊由山坳抄我步軍之後我軍回  
騎渡河策應斃賊四百餘名內有黃馬褂賊目



二名生擒十四名奪獲旗械百餘件渡河橋礮  
位俱被官兵掀墮水中探知各處賊壘共六十  
餘座我軍馬步分防相距一百餘里策應不便  
二十二日派鮑超以霆字二營移孔壠李續賓  
以九江三營移陸家嘴而小池口之賊乘間突  
出經營總巴克坦布叅領奇克興阿防禦蘇清  
阿等督隊馳剿都興阿由孔壠督隊接應擒斬  
頗多先是賊伏二三千於蘆葦中而以悍賊數

百誘戰官軍由江岍遙見蘆葦隱動遂以鎗箭  
環施馬隊亦由江岍橫抄合擊立斃伏賊百餘  
名生擒九名餘皆帶傷而逃是夜我軍分百人  
潛過渡河橋攜帶火彈火箭伏於麥田深處二  
十四日都興阿督領馬步攻渡河橋多隆阿帶  
馬隊及霆字前後營並姜玉順黔營密雅明阿  
帶馬隊及霆字中左右營倭克錦依林同王國  
才步隊分路齊進賊麇聚數萬隔河對放鎗礮

我軍數路齊進同時渡河立破賊營數座賊即  
反奔麥田之伏兵見大隊得手即向各營壘拋  
擲火蛋賊益驚潰乘勢併力連破賊壘二十一  
座斃賊二千數百名賊壘棚帳盡行焚燬烟焰  
騰空奪獲騾馬四十餘匹旗幟器械無算尚有  
賊壘三四十處依山傍水未及全燬此次悍賊  
偽豫天侯陳玉成由桐城率三萬餘衆又裹脅  
皖省饑民數萬併力上竄得此一戰賊氣已挫

人心稍定此四月二十及二十二二十四等日  
下游馬步各軍移剿獲勝之情形也 等查武  
漢克復之後該匪無日不思上竄且自江甯桐  
城安慶至於九江千里而遙沿江並無官軍阻  
截饑民游勇混入賊中非合全軍之力不能截  
遏賊鋒查九江及興國各營均已抽撥移駐而  
寶義平超四營又分赴黃州蘄水省城守兵不  
滿千名添兵則餉無可籌餉竭則兵心益渙李



孟羣原帶二千五百人昨據稟稱添募千名乃  
能由羅田一路馳援廬州惟偵知六安霍邱有  
賊萬餘已至流波磧又舒桐霍邱之賊陸續至  
者亦復不少必須添兵益餉等語 等接信實  
深焦灼現在楊載福水師聯布江面尚為安靜  
馬隊千餘人疊次力戰往來策應頗覺疲勞已  
飛催舒保巴揚阿訥依琿阿各率馬隊兼程馳  
赴策應除飭各路水陸馬步乘勝力攻並查明

陣亡弁勇另行獎卹外所有同知銜候選知縣  
李景湖守備銜藍翎千總張鵬高楊高桂把總  
胡開禮六品翎頂朱大倫從戎三年忠勇素著  
此次相隨血戰同時捐軀實堪憫惻可否仰懇  
天恩准將李景湖照知府例張鵬高楊高桂照都司  
例胡開禮朱大倫照千總例均予從優議卹以  
慰忠魂謹將抽調省兵及興國防兵赴援蘄州  
蘄水及馬步官軍移調剿賊獲勝情形謹合詞

由驛六百里馳

奏伏乞

皇上聖鑒訓示謹

奏咸豐七年五月初二日拜發五月十五日奉到  
硃批另有旨欽此同日奉到咸豐七年五月初九日

內閣奉

上諭官等奏赴援移剿連獲大勝一摺四月十八  
等日皖省賊匪分竄湖北蘄州蘄水邊界經同知

銜候選知縣李景湖等擒斬多名都興阿復於下  
游督率馬步官軍分路進剿毀賊壘二十餘座斃  
賊二千數百名奪獲騾馬旂幟器械無數此次賊  
由桐城上竄經該督等調援策應叠獲勝仗大挫  
賊鋒著即激勵將弁乘勝進攻將續至援賊盡數  
殲除毋令上竄所有陣亡之同知銜候選知縣李  
景湖著照知府例從優議卹守備銜藍翎張鵬高  
楊高桂均著照都司例從優議卹把總胡開禮六



品翎頂朱大倫均著照千總例從優議卹欽此

附奏楚北軍務喫緊難以抽兵赴豫一片  
再等於四月初四日四月二十二日先後准  
兵部火票遞到恭奉

上諭飭

官

臣胡林翼於襄樊等處征兵內湊撥

一千名派赴河南助剿等因欽此遵查河南捻匪  
屢被擊敗復勾結粵逆竄擾潁上楚北唇齒相  
依亟應分兵助剿惟鄂自武漢克復當因餉項  
支絀兵勇陸續裁撤以節糜費現在皖賊由宿

太英藿等處大股數萬人上犯連日調撥馬步  
各軍馳往防剿尚嫌單薄即省城守兵不過千  
人襄陽甫就肅清仍恐漏網餘孽狡馬思逞馬  
隊全行調赴黃州蘄水一帶防堵僅留候補道  
唐訓方一軍千餘人現因鄖陽尚有餘匪又分  
去四百人前往搜捕 等再四籌商刻下情形  
尚難抽撥相應籲懇

天恩俯念楚皖邊界軍務喫緊未便再分兵力一俟  
蘄水蘄州羅田黃梅等處賊匪擊退再行籌商  
抽撥斷不敢稍分畛域以仰副

皇上掃廓疆圉至意所有遵  
旨覆奏緣由謹合詞附片具

奏伏乞

聖鑒訓示謹

奏咸豐七年五月初二日拜發五月十五日奉到  
硃批覽奏已悉欽此



附奏請飭四川山陝各省籌撥餉銀一片

再武漢為東南樞紐八省咽喉而江西安徽河南尤為切近自古用武之地賊所力爭楚自軍興以來武昌三陷漢陽四陷其大較也此次大股皖賊分道內犯用意至狡籌餉則苦於兵多調兵則苦於兵少下游餉項積欠五月有餘計數百餘萬兩偶有接濟僅敷數日之糧岌岌不支勢難終日安慶桐城六安之賊彌山遍野而

北岍之前敵可慮瑞州臨江吉安之賊負隅死  
守而武昌之後路仍虛兼以羅田蘄水蘄州黃  
梅廣濟麻城路路可通防不勝防兩岍大軍均  
駐潯皖之境注意東征並非為湖北設立防兵  
賊之間道內犯實欲搖動東征之師使我軍餉  
路梗回顧武漢乃得逞其奸謀也萬一餉竭兵  
譁江皖豫三省之賊乘虛而入大局不堪設想  
就現在情形而論厚集兵力或可力遏兗鋒所

患欠餉日久軍心渙散水師馬隊當思竭力保  
全防兵守兵更宜及時招募蓋鄂居天下之中  
兵弱則四面受敵兵強則四路均可策應熟慮  
審思鄂之安危關係東南數省無如兵燹之餘  
加以饑饉民氣凋殘未敢操之過切兼以賊蹤  
緊逼商民裹足鹽釐各項催收不易合無仰懇  
皇上天恩俯念鄂中兵餉實在不敷皖賊現又大至  
都興阿馬隊楊載福水師李續賓步軍寶東南



不可少之勁旅請

敕下四川山西陝西督撫臣於每省按月籌撥銀五  
萬兩務須如數如期委員解楚以濟饑軍以全  
大局感戴

鴻慈曷有既極 等不勝迫切待

命之至謹合詞附片

奏懇伏乞

聖鑒訓示謹

奏咸豐七年五月初二日拜發是月十五日奉到  
硃批戶部速議具奏欽此

附奏將發剩部頒捐照轉發北藩司設局辦理一片

再前准戶部頒發花翎藍翎各項職銜及貢監空白各照咨明就近填給捐生所以勸助軍需俾期踴躍於咸豐五年五月會酌留前在荊州將軍任內請領各照五百張六月接收前督臣楊霽移交用剩各照六十六張並委員呈繳各照一百五十四張十一月又酌留將軍任內



二次請領各照二千二百張是月又收到部頒  
前察哈爾都統西凌阿所請各照六百張又於  
六年八月咨借署將軍載增移交各照五百七  
十張均有字號次數可稽因籌撥兵勇口糧不  
敷據各營統領各大員隨時請領並發給各府  
州縣勸捐接濟又令於襄郡分設捐局各在案  
茲武昌省城克復半載藩司馬秀儒為總辦糧  
臺大員行飭於省城崇設捐輸總局遴委幹

員經理已將發剩各照開單轉發藩司馬秀儒  
接收並飭由司查催前領各照之員解齊捐項  
非軍需不准挪用絲毫其已解已用之款一併  
歸入軍需案內造報一面催取各捐生姓名年  
貫冊籍照例辦理並咨明戶部外謹附片陳明  
伏乞

聖鑒謹

奏咸豐七年五月初二日拜發十五日奉到

硃批知道了欽此

附奏請飭調陝西副將龍澤厚一軍赴河南  
軍營一片

再皖豫交界賊衆兵單楚軍勢難調撥等同  
深焦灼查陝西副將龍澤厚前經帶兵二千名  
來楚會剿鄖竹匪徒現在襄鄖已漸肅清只須  
酌留陝兵數百名搜捕豫楚餘孽合無仰懇  
聖恩敕下陝西撫臣曾望顏飛調龍澤厚一軍選帶  
弁兵千名馳赴河南英桂等軍營聽候調遣以



資助剿 等愚昧之見是否有當伏候

訓示祇遵謹附片陳明伏乞

聖鑒謹

奏咸豐七年五月初二日拜發五月十五日奉到

硃批另有旨欽此五月二十三日接准

陝西巡撫曾 咨會片奏內稱承准

軍機大臣字寄咸豐七年五月初九日奉

上諭前據英桂等因兵力不敷奏請飭調湖北官兵

當經諭令官 等酌調官兵千名赴豫會剿茲據

該大臣等奏賊衆兵單楚軍亦難調撥請飭陝西

省即調龍澤厚一軍馳赴英桂軍營等語龍澤厚

所帶陝兵前經英桂等奏因光固一帶喫緊已飛

咨該副將前往援剿現在龍澤厚是否已赴光固

尚未據英桂等續報著曾望顏迅即飭令該副將

前往河南聽候英桂等調遣等因欽此

附奏進駐省署辦理善後等事一片

再坐營駐紮漢陽上接荆襄下扼武黃為犄角之勢以壯大江北岍聲威現在襄郡漸就肅清下游水陸馬步各軍攻剿尚稱得手查漢黃一帶情形刻下較緩惟全省吏治兵政及善後清查諸多要務亟應分別整頓隨時應與撫臣暨司道等官面見熟籌而隔江往返咨函無以嚴肅關防而昭體制惟總督衙署焚燬片瓦無



存籌款修復尚需時日因有鹽道殘署修補苟  
完暫堪居止 已於四月二十二日進署辦事  
其漢陽坐營酌派川兵數百名駐守巡防 仰  
蒙

恩命自當於軍務地方緩急兼顧不敢有負  
生成如九江剋日得手即可裁撤坐營藉節餉需或  
下游軍情較緊 刻即回營相機布置調兵督  
剿庶緩急有恃於軍務地方兩有裨益謹附片

陳明伏乞

聖鑒訓示謹

奏咸豐七年五月初二日拜發五月十五日奉到  
硃批知道了欽此

奏揀員請補苗疆守備要缺一摺

奏為揀員請補苗疆守備要缺以實營伍恭摺具  
奏仰乞

聖鑒事竊照鎮筵鎮標中營後軍守備王耀盛於失  
守龍陽縣城案內例應革職又沅州協分防晃  
州汛守備田景仁因案擬降千總旋即病故均  
經

題報開缺在案其所遺守備二缺俱係苗疆要缺



現值黔苗未靖自非熟悉營伍防勦出力之員  
難期勝任 詳加揀選查有勦辦銅匪尤為出  
力之鎮筭鎮標右營左哨千總包順科現年三  
十八歲係湖南鳳凰廳人由行伍於道光三十  
年出師新甯勦捕出力經前督臣裕泰奏奉

上諭賞戴藍翎續勦粵西賊匪歷拔千總上年銅匪  
滋事防守鎮城並克復麻陽縣城在事尤為出  
力該弁年壯才明營伍練達歷俸已滿三年出

師著績又長安營右哨千總現署鎮筭鎮標中  
營右哨千總吳支陞現年四十二歲係湖南鳳  
凰廳人由行伍歷拔千總上年克復銅城勦平  
賊匪巢穴經撫臣駱秉章奏奉

上諭著以守備留於湖南補用並賞戴藍翎欽此該  
弁年壯技嫻諳練營伍迭次打仗最為得力現  
在俱無親喪違碍事故於苗疆情形最為熟悉  
相應仰懇

聖恩俯念員缺緊要人地實在相需准以千總包順  
科陞補鎮算鎮標中營後軍守備並准以千總  
吳支陞陞補沅州協分防晃州汛守備員缺洵  
屬人地相宜於營伍大有裨益如蒙

俞允並請

敕部先行給予陞署劄付俟防勦事竣再行給咨送

部引

見再包順科係鳳凰廳人由鎮算鎮標中營兵丁出

身仍俟邊境肅清再與隔府別營之員揀選對  
調以符定制除飭取履歷清冊另咨送部外謹  
會同湖南撫臣駱秉章署提臣張殿元合詞恭  
摺具

奏伏乞

皇上聖鑒訓示謹

奏咸豐七年五月初二日拜發十五日奉到

硃批兵部議奏欽此



附奏懇將隨營差遣之候選同知各員飭部  
先行銓選一片

再上年武漢克復後所有隨營差遣各員均  
經分別遣撤以節糜費而昭體恤茲查有候選  
同知劉則傳候選知州黃世煦候選通判吉爾  
哈春現仍隨營差遣尚有經手未完事件一時  
未能赴部投供可否仰懇

天恩

敕部先行照例註冊開選俟選缺後再由 給咨送

部引

見之處出自逾格

恩施謹附片陳

奏伏乞

聖鑒祇候

訓示施行謹

奏咸豐七年五月初二日拜發十五日奉到

硃批著照所請欽此



附奏請飭部遇有北南兩省副將叅遊都守

缺出暫停陞選概由軍營揀員請補一片

再前議整頓營伍首在將領得人而戰守機

宜尤以熟諳兵情地利乃能訓練有方查湖北

湖南兩省副將叅遊都守所遺各缺或應由外

題補或由部陞選惟現在本省保舉軍營著績者

員數較多於地方營務均為熟悉下愚之見

當此楚省兵事方殷武備以得人為要與其部

選初到之員難期得力莫若暫為變通務收實效所有北南兩省副將叅遊都守遇有缺出及現在未經擬補各缺相應請

旨敕下部臣一律暫停陞選概由 揀員

題補裨收人地相宜之益一俟軍務告竣仍遵舊制辦理 為整理營伍起見未敢擅便謹附片具

奏伏乞

聖鑒訓示謹

奏咸豐七年五月初二日拜發十五日奉到

硃批兵部議奏欽此



奏參安襄等屬堵禦不力之存城各營弁請  
分別斥革一摺

奏為特參安襄等屬前被土匪竄擾入城堵禦不  
力之存城各營員弁請

旨分別斥革以肅營伍仰乞

聖鑒事竊上年襄陽土匪滋事竄擾光化穀城房縣  
保康竹山竹谿宜昌荆門遠安等州縣又隨州  
土匪擾及安陸郡城經 將失守地方之文員

並該管鎮將先後

奏叅在案查各該屬駐守城內之武職員弁均有地方之責雖因匪衆兵單尚無畏葸逃避情事旋即隨同馬步兵勇攻剿克復惟未能妥籌布置究屬防禦不力咎無可辭相應查明據實

奏叅請

旨將署安陸營都司揀發都司炳輝荆門營守備蘇都哩署提標前營守備均光營千總李鳳林遠

安營守備吳杰等四員均革職留任又穀城縣署提標中營守備衛昌營守備李殿元把總孫云科署房縣守備選補陝西邠州營都司魏鴻興署竹山協中軍都司右哨千總梁輔綱右哨千總鄧凝道把總程得洪安陸營左哨千總尹紹本以上七員請一併革職留營効力以昭懲儆而肅營伍除分防汛地各弁另行咨革外所有安襄等屬前被土匪竄擾堵禦不力之存城



武營員弁請分別斥革緣由謹會同署提臣前  
鄖陽鎮總兵官訥欽繕摺具

奏伏乞

皇上聖鑒訓示謹

奏咸豐七年五月十四日拜發閏五月初一日奉

到

硃批另有旨欽此同日奉到咸豐七年五月二十三

日內閣奉

上諭官 奏查明堵禦不力之營弁請分別懲辦一  
摺湖北襄陽及隨州土匪上年竄擾光化等縣並  
宜昌荆門安陸等處其失守地方文員及該管鎮  
將業經官 等先後奏參分別懲辦至駐城營弁  
雖查無逃避情事惟防堵不力實屬咎無可辭湖  
北揀發都司炳輝守備蘇都哩千總李鳳林守備  
吳杰均著革職留任守備李殿元把總孫云科署  
守備選補陝西都司魏鴻興千總梁輔綱鄧凝道

把總程得洪千總尹紹本均著革職留營効力以  
示懲儆餘著照所議辦理該部知道欽此

附奏懇將剿辦襄匪出力之道員優獎一片  
再查陞用道唐訓方前於襄陽土匪滋事帶兵  
往剿疊次身先士卒陷陣衝鋒大獲勝仗嗣生  
擒首逆高二先等就戮襄樊賴以肅清該員謀  
勇兼全廉明練達軍旅之暇撫輯地方民心悅  
服實屬有為有守之員合無仰懇

聖恩賞加按察使銜並求

賞頒勇號以示優獎唐訓方必更竭盡血誠 等亦



得收指臂之效伏候

欽定

訓示祇遵謹

奏咸豐七年五月十四日拜發閏五月初一日奉

到

硃批另有旨欽此同日奉到咸豐七年五月二十三

日內閣奉

上諭官等奏請將剿匪出力之道員獎勵等語湖

北道員唐訓方前於剿平均州賊匪案內經曾望  
顏保奏業經降旨將該員交軍機處記名遇有湖  
北道員缺出請旨簡放茲據該督等奏稱唐訓方  
疊次剿辦襄樊土匪均能身先士卒屢獲大勝甚  
屬得力唐訓方着再加恩賞給按察使銜以示優  
獎欽此

附奏懇留丁憂道員差遣一片

再查捐陞雙月候選道前署鄖陽府揀發知府  
恩祥有守有為明白體面因丁父憂例應回旗  
守制惟楚北地方現當籌辦善後諸務 等勵  
精圖治得人非易伏乞

天恩俯准恩祥在楚終制以道員留於湖北酌量差  
委仍俟服闋遇有缺出請

旨補用出自



鴻施等未敢擅便謹附片具

奏祇候

訓示遵行謹

奏咸豐七年五月十四日拜發閏五月初一日奉

到

硃批依議欽此

會同北撫奏議覆懲辦逃兵一摺

奏為遵

旨會議懲辦逃兵恭摺奏乞

聖鑒事咸豐六年五月二十七日七年三月十三日

先後准刑部咨奉

上諭御史宗稷辰奏請嚴查潰兵一摺著各將軍督撫將此項逃歸兵丁應如何懲辦之處嚴定章程妥議具奏等因欽此查自粵匪肆逆以來征調頻

年協剿備防全資兵力乃各省營務廢弛不明  
紀律或聞警先逃或臨陣潰散誅不勝誅一經  
回營覘然入伍恬不為怪查定例征兵私自潛  
逃挈獲者斬立決在軍務未竣以前投首者發  
烏魯木齊等處給種地兵丁為奴軍務告成之  
後投首者擬斬立決奏請

定奪立法本已至嚴罪名無可加重惟受傷患病迷  
失路徑落後有因查非有心脫逃在軍務未竣

以前投首者免罪拿獲者杖一百徒三年軍務  
告成之後投首者亦杖一百徒三年拿獲者發  
烏魯木齊給兵丁為奴等語詳繹例意逃兵投  
首分別軍務已未告竣為其有無規避也則在  
軍務未竣以前回營者即與自首無異惟患病  
受傷原可請假調治若竟擅離軍營即屬咎有  
應得應請嗣後患病受傷並無軍營咨照擅自  
回營及投首雖在軍務未竣以前者均革退除



糧若拿獲並軍務告成後投首及拿獲者均照各本例辦理迷失及落後兩項軍行迅速原不准其逗遛其稱迷失落後相距大營必不甚遠即應尋覓路徑趕赴軍前復何待於投首應請不分軍務已未告竣但回營者均照軍務告成後投首例杖一百徒三年拿獲者發烏魯木齊給兵丁為奴若無故逃回即照例擬斬奏請定奪如此明定章程庶各營知所警惕而臣竊謂兵

勇之強弱惟視將領為轉移主將得人三軍用命譬如天君泰定則身之使臂臂之使指百體因而從令誠如

諭旨將弁私逃尤屬可惡即應嚴拿正法臣督師以來無日不以選將為急應請

敕下各直省將軍督撫留意水陸將才為

國備干城之選即為兵專統馭之權至地方官失察逃兵隱匿在境及經別處盤獲吏議森嚴應

由各督撫申明處分嚴飭所屬一體嚴拿懲辦  
庶足以申軍律而肅戎行是否有當謹合詞恭  
摺奏乞

皇上聖鑒訓示謹

奏咸豐七年五月二十一日拜發閏五月初五日

奉到

硃批刑部議奏欽此

奏紳民捐資助餉請叙官職一摺

奏為紳民捐資助餉循例指請官職籲懇

恩施俯准獎叙仰乞

聖鑒事竊照北岍軍營前因餉源不繼隨地勸捐  
接濟曾將節次捐輸紳民奏蒙

恩准獎勵在案茲查續據報捐各生在行營糧臺

陸續捐繳銀二萬五千四百四十五兩零又錢  
二萬九千九百串有奇又前督臣楊需大營糧



臺尚有收捐四戶共銀一千八百餘兩因值交卸未經請獎由原辦糧臺之員移知湖北布政司馬秀儒查明屬實已歸入前任督臣報銷案內詳請彙獎前來查該紳民等捐資助餉實屬深明大義其捐繳銀錢均係遵照籌餉事例並以錢折銀章程計算實數均與指請官職尚屬相符除將捐項隨時湊濟軍需並添製軍裝器械帳篷等項歸入軍需案內造報外相應繕列

清單恭呈

御覽仰懇

天恩准予獎叙

勅部覈明分別填頒執照由驛迅發來楚轉給祇領以昭激勸而廣招徠以免捐生觀望不前感荷鴻慈實無既極謹將北岍軍營收繳紳民捐資助餉請叙官職緣由謹會同湖北撫臣胡林翼恭摺具

奏伏乞

皇上聖鑒訓示謹

奏咸豐七年五月二十二日拜發閏五月初八日

奉到

硃批戶部覈議具奏單併發欽此

謹將紳民捐資助餉循例指捐官職彙繕清單  
恭呈

御覽

計開

江西即選同知龔亨榮南北兩營共捐錢一萬  
二千一百串請以知府不論雙單月分發四川  
補用並請隨帶加一級

湖北武昌縣俊秀陳壽昌捐銀三千四百二十



二兩一錢六分請作為監生以知州雙月選用  
安徽太湖縣廩生李德曙捐銀五千零四十七  
兩請作為貢生以直隸州知州雙月選用

安徽懷甯縣監生姜璇捐銀二千七百一十兩  
請以知縣雙月選用

河南光州俊秀吳銘謙捐銀二千零九十三兩  
請作為監生以通判雙月選用

雲南廣南府廩生方玉潤河南固始縣廩生劉  
倣罷各捐銀二百五十四兩均請作為貢生以  
復設訓導雙月選用

河南固始縣外委劉玉奇捐銀七百三十一兩  
請給予都司職銜

廣東順德縣俊秀何越智捐銀六百六十二兩  
請作為監生以外府經歷雙月選用

安徽太湖縣州同銜李世鎮捐錢一千三百一  
十串請以州同雙月選用

湖北孝感縣議叙雙月縣丞徐志曾捐錢八百六十串請以縣丞不論雙單月分發陝西補用  
湖北孝感縣監生李積書捐錢二百六十串請  
給予府經歷職銜

藍翎同知銜遇缺即選知縣潘曜新捐錢三千零八十串請

### 賞換花翎

湖北咸甯縣附生呂國琛捐錢一千二百串請

作為貢生以復設訓導不論雙單月分發補用  
四川綿竹縣俊秀陳庸捐錢二千三百九十二串請作為監生以縣丞不論雙單月分發陝西補用

廣西桂林縣俊秀汪寶涵捐錢七百五十串請作為監生以從九品不論雙單月選用  
江西甯都州俊秀彭廣鎮捐錢四百五十串請作為監生以從九品雙月選用



湖北漢陽縣八品職銜馮國興捐銀一千零一十四兩請作為監生以縣丞不論雙單月分發山西補用又俊秀馮國蔚捐銀一千兩請作為監生以縣主簿不論雙單月分發河南補用湖北黃岡縣六品軍功郭瀛洲捐錢一千九百串請作為監生以外府經歷不論雙單月分發四川補用湖北武昌縣俊秀陳紹基捐銀一千一百八十

八兩二錢五分請作為監生以縣丞不論雙單月分發湖南補用

湖北黃岡縣俊秀童範偉武昌縣俊秀陳錫疇各捐銀五百七十兩三錢六分均請作為監生以從九品不論雙單月分發湖南補用

湖北黃岡縣文童汪鴻捐銀五百九十一兩請作為監生以巡檢不論雙單月分發湖南補用湖北揀發未入流劉春生捐銀三百六十兩請

以縣丞歸部雙月選用

湖北隨州監生萬成杰捐錢四百串請給予布政司經歷職銜

湖北隨州俊秀王師振捐錢八百三十串請作為監生以營千總分發本省拔補

湖北隨州俊秀王恩錫捐錢六百二十串請作為監生以道庫大使不論雙單月選用

湖北隨州俊秀王恩普捐錢五百八十串監生

萬慶楨捐錢四百串均請給予布政司理問職銜

湖北隨州坐補浙江按察司經歷萬慶詔捐錢一百二十串查該員前捐錢四千五百串

奏請以知縣不論雙單月選用接准部咨應補錢一百二十串茲據該員如數補繳錢一百二十串請以知縣不論雙單月選用

湖北隨州就職直隸州州判萬慶齡捐錢二千



三百串請給予同知銜

候選通判段永源捐銀二千五百兩請以知州  
雙月選用

俊秀劉傳經捐銀一千四百七十八兩請作為  
監生以縣丞不論雙單月本班儘先選用

湖北黃岡縣文童范鈞捐銀一千兩請作為監  
生以府經歷不論雙單月分發省分補用

荊州駐防鑲白旗滿洲佐領哲勻捐錢二百三

十串四百文查該員前經捐加二級請

給予二品

封典接准部咨應照隨帶加級報捐行令補繳茲據  
該員補繳錢二百三十串四百文請

給予二品

封典

以上各員均係去歲陸續捐輸經 覈明批示

彙獎內有在軍營出力各員武漢克復案內保

請陞階業蒙

恩准茲將該員等原捐應得官職彙請獎叙理合聲明

湖北孝感縣監生張慶齡在前督臣楊需軍營捐銀二百五十七兩四錢請以從九品不論雙單月選用

河南息縣監生易朝棟在前督臣楊需軍營捐銀五百六十一兩六錢請以外府經歷雙月選

用

安徽阜陽縣軍功李綸田在前督臣楊需軍營捐銀七百一十五兩五錢請作為監生以外府經歷雙月選用

湖北漢陽縣不論雙單月選用從九品姚家棟在前督臣楊需軍營捐銀二百七十六兩八錢請分發省分補用

以上四員均係前督臣楊需軍營收捐已歸原



辦糧臺之員辦理報銷據湖北布政司馬秀儒  
查明請獎再以上請獎各員均係查照籌餉事  
例並銀錢減折章程覈算請給官職理合聲明

附奏總兵各員捐廉助餉請將其子議叙一  
片

再 接據署湖北提督前任鄖陽鎮總兵官訥  
欽呈稱前在施南協及署鄖陽總兵湖北提督  
各任內有應領俸廉等銀二千七百五十兩四  
錢又據前均光營叅將李朝榮呈稱應領俸薪  
等銀五百三十二兩四錢據各聲明現值庫藏  
支絀軍餉不繼未敢請領均情願呈繳歸入軍

需不敢仰邀議叙等情行據湖北布政司馬秀  
儒查復應領銀數相符請將前項俸廉等銀如  
數移解糧臺歸入軍需支用等情前來 伏查  
訥欽等呈繳應領廉俸捐濟軍餉實屬仰體時  
艱情殷報効查定例大員輸助軍餉蒙

恩准歸其子弟獎勵有案可否仰乞

聖恩逾格

賞准訥欽之子豐陞作為監生以主事雙月選用李

朝榮之子豫陞作為監生以門千總雙月選用  
覈與籌餉事例及減成章程均尚相符訥欽等  
感沐

隆施曷有既極所有訥欽等呈繳俸廉銀兩捐濟軍  
餉除彙冊報部外 為獎勸捐輸起見是否有  
當謹附片陳明請

旨伏乞

訓示祇遵謹



奏咸豐七年五月二十二日拜發閏五月初八日  
奉到

硃批另有旨欽此同日奉到咸豐七年五月三十日

內閣奉

上諭官 奏總兵各員捐輸軍餉援照成案懇恩給  
予伊子獎叙等語署湖北提督前任鄖陽鎮總兵  
訥欽之子豐陞着作為監生以主事雙月選用前  
任均光營叅將李朝榮之子豫陞着作為監生以

門千總雙月選用該部知道欽此

奏揀員擬補布特哈防禦等缺一摺

奏為布特哈防禦等缺揀員擬補仰乞

聖鑒事竊 准兵部清字咨文內開布特哈墨爾根

城防禦一缺送至軍營揀放等因當經行知江甯將軍都興阿揀選軍營出力各員咨請驗補前來 詳加考驗查有驍騎校委叅領獎賞花翎穆圖善打仗奮勇堪以補放墨爾根城防禦一缺其所遺驍騎校之缺查有領催委叅領莽



賚巴圖魯都嘎爾搽防認真堪以擬補除飭取  
履歷咨送部旗外相應籲懇

皇上天恩俯准以穆圖善都嘎爾補放防禦驍騎校  
各缺出自

聖裁謹會同江甯將軍都興阿繕摺具

奏伏乞

皇上聖鑒訓示謹

奏咸豐七年五月二十二日拜發閏五月初八日

奉到

硃批穆圖善都嘎爾依擬升補欽此

附奏懇展限舉行軍政一片

再 接准部咨咸豐七年又屆軍政之期各省  
提鎮大員例應於咸豐七年十月內送部詳核  
實績繕寫清單恭呈

御覽其副將以下官員應卓異者查照定額舊章辦  
理應劾官員詳細登註分別保題叅奏其照常  
留任者填註考語俱於十月以內具

題到部等因當經移行提鎮及各營將領遵照在



案 伏查北南兩省營伍因連歲軍興均多徵  
調出師在營實任者為數無幾事關舉劾人才  
大典考察倍宜詳慎 前因楚北武備廢弛籌議實  
力整頓情形縷陳

聖鑒其將領中或庸懦性成或搯防怠玩或人地不

宜亦經

奏參分別懲辦現值軍政屆期既未敢因循遷就  
亦未敢草率舉行除咨行提鎮各營認真訓練

遴選將士期謀勇之兼全備干城之任使 仍  
加意訪察如有庸劣不職之員隨時據實參辦  
外所有本屆楚省軍政相應仰懇

聖恩俯准展限一年俟軍務告竣出師員弁凱撤歸  
伍來歲秋間酌量情形分別辦理以昭覈實祇候  
訓示遵行謹附片陳明伏乞

聖鑒謹

奏咸豐七年五月二十二日拜發閏五月初八日

奉到

硃批着照所請行欽此

附奏請將打仗陣亡之馬隊官兵議卹一片  
再接據都興阿咨報本年三月初五初九十三  
等日四月二十至二十七等日黃梅縣屬馬步  
各隊官兵先後攻燬小池口賊壘並迎剿楓樹  
坳獨山鎮一帶賊衆踏平賊營數十屢獲大勝  
我兵亦有傷亡除受傷員弁兵勇二百九十六  
名給資醫調又陣亡兵勇八十二名另行造冊  
咨部彙



題請卹外查吉林獎賞藍翎委驍騎校官福額外  
驍騎校委官保福獎賞藍翎凱清阿全祿和錦  
穆吉楞額德明阿德海黑龍江城獎賞藍翎富  
興阿海青阿雙凌六品頂戴喀勒喀代七品頂  
戴烏勒興保開化營六品軍功夏正壽以上十  
四員名奮勇剿賊臨陣捐軀實堪憫惻合無仰懇  
天恩勅部將官福等十三名均從優照驍騎校例議  
卹六品軍功夏正壽從優照外委例議卹出自

鴻施謹附片具

奏伏乞

聖鑒訓示施行謹

奏咸豐七年五月二十二日拜發閏五月初八日奉到  
硃批官福等均照所請議卹欽此

13



